

ditta sia prorogà per altri do anni, *ut in parte*. Ave 160, 3, 2. La qual parte lexè Lunardo Sanxon secretario a loro deputato, el qual non vien in Pregadi, ma vene a lezer questa parte.

Fu posto per tutto il Collegio, atento sia stà retenti in diverse terre zerca 17 tra caporali et soldati di quelli che in questa guerra, essendo a li nostri stipendii in campo di quà di Ada fuziteno in Lodi, pertanto sia preso et commesso il processo fatto contra li ditti et tutte le scritture sian mandate a sier Zuan Moro podestà et capitano de Crema, el qual se ritrovava, quando i scampono, Proveditor zeneral in campo ditto di qua di Adda, il qual habbi autorità di punirli *usque ad mortem* come a lui e la iustitia parerà, *ut in parte*. Fu presa. Ave: 148, 14, 9.

Fu posto, per li Consieri, dar il possesso di santa Maria di Axola di brexana, vacado per la morte di domino Julio di Magnavini ultimo retor di quel beneficio, il qual il reverendo domino Antonio Marzello arziepiscopo di Patras et episcopo emoniense, locotenente dil reverendo domino Paulo Zane episcopo di Brexa et suo vicario, ha dato a domino Bernardin Verzerio clerico emoniense per esser il mexe ordinario di lo episcopo, come apar per la bolla fata a Brexa a dì 22 Zugno passato. Ave 116, 4, 10. Nota. È di sier Anzolo Zane di sier Piero.

A dì 8. La matina non fo alcuna letera da conto, et li Cai di X steteno longamente in Colegio.

Et li Consieri veneno poi a Rialto a incantar le galle di Alexandria, et stati un pezo non trovano patroni.

Li officii di Rialto e san Marco di iustitia non sentono, ma ben le Quarantie, et questo per il dezun del' jubileo.

Da poi disnar fo Consejo di X semplice, fono . . . mancò sier Nicolò Zorzi è dil Consejo di X, perchè li venne un dolor grandissimo di corpo, che 'l non potè venir. E come li fo passà la doja, venne per venir al Consejo di X, et il Consejo di X veniva zoso, sichè non andò.

272 Et reduto il ditto Consejo di X dove fono li sottoscritti, stati alquanto, veneno zoso sier Valerio Valier cao di X, et sier Zuan Antonio Venier avogador di comun con Hironimo Dedo secretario dil Consejo di X, et andono a parlar al Canzeliero grando, dicendoli el Cao di X queste formal parole: « Nicolò Aurelio, l'ha parso a lo Eccellentissimo Consejo di X per li toi mensfati di confinar te in perpetuo in la città di Trevixo, con condition che ti apresenteri una volta a la settimana a quel retor, in pena ducati 100 non si apresentando, la qual

pena sia del retor, et rompendo il bando el preso che fossi, debi star uno anno in prexon e tornar al confin, con taia lire 2000 e li toi beni siano obligadi a la ditta taia. *Item*, sia privo in perpetuo di tutti officii e beneficii di la Signoria nostra e non se li possi far gratia se non per tutte 17 ballotte del Consejo di X.

Et Zuan Jacomò Trivixan canzelier di Torzello, qual era in camera, *etiam* fo expedito, et mandato da basso, *videlicet* che 'l compia uno anno in prexon, et confinà poi per anni 10 in l'isola nostra di Arbe, con taia lire 1000, e privo di tutti officii et benefici de la Signoria nostra.

Ancora expediteno Mindan mantoan, il qual da Marzo fin Mazo, che 'l fo retento, havia fatto venir in questa terra dopioni mirandoleschi e altri ducati di tal sorte zerca 17 milia, di la sorte ch'è stà banditi, che 'l dito sia condanà a pagar ducati 1000 a l'Arsenal e non ensi di prexon fin el non pagi, e poi bandito di terre e luogi di la Signoria nostra in perpetuo, con taia etc. E possi star in prexon per zorni 15 per scuoder quanto el dia aver, *ut in condemnatione*, la qual dia esser publicada su le scale de Rialto.

Et sier Francesco Bollani, fo avogador, non fo expedito, e si disse che l'ultimo Consejo di X fo taia il suo spazo di Collegio. *Etiam* fo spazà il Canzeliero grando, ma ozi terminono publicarlo, però che non va mai un Cao e un Avogador a dir ad alcun la sua condanason si non è per vita, et al Canzeliero bandito è venuto a dirlo, e si dice si extremi quando intese el Cao e Avogador erano li per parlarli.

Questi fono nel dito Consejo di X a far tal condanation: 272'

El Serenissimo.

*Consieri*

Sier Alvise di Prioli.

Sier Zuan Miani.

Sier Piero Lando.

Sier Marco Dandolo dottor, cavalier.

Sier Lazaro Mocenigo.

Sier Lunardo Emo.

*Cai di X.*

Sier Andrea Magno.

Sier Valerio Valier.

Sier Alvise Mocenigo el cavalier.